

傷寒譜

嘉慶癸亥年鑄

傷寒譜

大中堂藏版

R 252.2
10

梧岡先生姓沈氏古鶚忠孝世家裔也其先
即以醫名世迨先生而益著我伯兄之官浙
右山左而迎養也延先生幕中凡湯藥非
經其手調不敢進余始得與訂忘年交然
二十餘年未嘗出一戲謔語其為人寡言笑
澹聲色嚴取與惟好讀書手終日不釋
卷經史百家無所不通著作六日以富先生飲

然也与人交披露肝膽叙尚氣誼每自道生平行誼居心亦多少隱故余竊能言其梗概先生夙慧過人於三式之學自幼有神解既習舉業應童子試即冠一軍會丁親喪遂絕意進取慨然負希文之志曰安在不芻蕘相業哉爰強記博聞自靈素以下數千百家書罔不參互攷訂然其得力初不係此嘗

語人曰內經一書窮天察地之文居大半故不
知天時不識地宜者不可以言醫於是仰而
觀象俯而觀法推測體會不爽絲黍而猶
以為未足以入神也夫且參之易象以究其
變焉其治易也博綜羣言抄衷漢儒疏
攷寒暑無間者垂數十年屢自許曰此
吾半生心血後世必有知己者時或作為詩歌

以見志吟風弄月頭、是道矣夫易之為書
所稱變動不居者先生即寓其舉措于醫
無惑乎指下通神而吉无不利也則所謂醫
和之目豈遁疾洵非一朝一夕之故也先生既
神明乎古人之法而又筆之于書手訂若干
部其以譜名者取譬於奕也病機之虛實
陰陽變而未易測也而徵諸譜一奕之黑白

昭然乎治法之寒熱攻補變而不可泥也而
備于譜一奕之後先不紊乎師之則勝畔之
則負及其化也不必規于譜而自與譜合則
庶幾作者之微意乎昔先生嘗述當代名
公卿間有欲請其書付剞劂者屢有所阻
而不果今憇南錢君為刊以公世雖先生
之立言其精氣固能自發見必不可久揜

顧公錢君知是以知之義有以成之也嗚呼均
是千古已傷寒譜為友朋仲景之書學
者必深通其旨而後有根柢故付梓先及
之餘將以次及乃先生忽於玄秋作古我知
全豹之文將必踵事以表彰之此特先見
一斑耳刊將落成先生令似屬序於余之
故不知醫者雖然余不托道其書中之旨

而能述其作書之由先生之志固將濟世
於仁壽者也先生之學特於醫露其端
倪也然則是書也非即其功業之不朽者哉
今似年未及冠能讀父書亦可為克負
荷者矣

嘉慶壬戌九月中浣愚弟徐惠拜序并書

鳳輝早年失怙屢困童子試弱冠後先大父命習軒岐之術以繼家學遂取靈樞素難中藏甲乙諸經讀之十更寒暑而陰陽之理天人之奧運氣之推遷經絡之流注及三部九候之精微奇經八脈之要旨竝茫然不解作何語也既而復取晉唐以下諸名家之著述而盡讀之又十年始得其梗概因輯醫譜若干冊然於傷寒則猶未慊原夫傷寒書漢長沙守仲景張子始也以前素問難經雖啓其端而未暢其說若翁公若和緩相爲禁方其法不傳仲景懼宗族之淪亾者三分有二傷寒十居其七乃勤求古訓博採前方誤成傷寒卒病論合一十六卷凡風寒暑溼燥火

之離合變化莫不有法有方開鴻濛而立標率固萬世醫
門之祖也自西晉太醫令王叔和編次仲景書紊其條例
以附己意使廬山真面目不可復識而傷寒一書亦若存
若亡久矣在可有可無之數矣至宋成無已尊信其書取
而箋釋之獨開草昧厥功偉焉惜其順文爲義隱晦尙多
是以有志仲景者徒深景行之思仍抱望洋之憾漫漫長
夜千有餘年幸近時方中行喻嘉言程郊倩柯韻伯程扶
生錢天來諸公爬羅剔抉刮垢磨光快論掀翻精義橫出
雖互有得失而微瑕固無損於連城也學者堅心以研之
虛心以會之純粹者取之紕繆者畧之安見仲景之門不

循循然從此可入手用是不揣固陋揚數家之菁英發六
經之底蘊宏綱細目比類而分和璧隋珠聯篇以見名曰
傷寒譜者以其總統於醫譜也書既成非敢懸諸國門或
可少慰先大父之心於萬一耳其原文有不安之處集解
有未當之條駁而正之是重有望於海內之君子乾隆丁
未仲春日嘉定沈鳳輝自序

原序

余每覽越人入號之診望齊侯之色未嘗不慨然歎其
秀也怪當今居世之士曾不留神醫藥精究方術上以療
君親之疾下以救貧賤之厄中以保身長全以養其生但
競逐榮勢企踵權豪孜孜汲汲惟名利是務崇飾其末忽
棄其本華其外而頽其內皮之不存毛將安附焉卒然遭
邪風之氣嬰非常之疾患及禍至而方震慄降志屈節欽
望巫祝告窮歸天束手受敗資百年之壽命持至貴之重
器委付凡醫恣其所措咄嗟嗚呼厥身以斃神明消滅變
爲異物幽潛重泉徒爲啼泣痛夫舉世昏迷莫能覺悟不

惜其命若是輕生彼何榮勢之云哉而進不能愛人知人
退不能愛身知己遇災值禍身居厄地蒙蒙昧昧蠢若遊
魂哀乎趨世之士馳競浮華不固根本忘軀徇物危若冰
谷至於是也余宗族素多向餘二百建安紀年以來猶未
十穩其死亾者三分有二傷寒十居其七感往昔之淪喪
傷橫天之莫救乃勤求古訓博採衆方撰用素問九卷八
十一難陰陽大論胎臚藥錄并平脈辨證爲傷寒卒病論
合十六卷雖未能盡愈諸病庶可以見病知源若能尋余
所集思過半矣夫天布五行以運萬類人稟五常以有五
藏經絡府俞陰陽會通元冥幽微變化難極自非才高識

妙豈能探其理致哉上古有神農黃帝岐伯伯高雷公少
俞少師仲文申世有長桑扁鵲漢有公乘陽慶及倉公下
此以往未之聞也觀今之醫不念思求經旨以演其所知
各承家技終始順舊省疾問病務在口給相對斯須便處
湯藥按寸不及尺握手不及足人迎跌陽三部不參動數
息發不滿五十短期未知決診九候曾無髣髴明堂闕庭
盡不見察所謂管窺而已夫欲視死別生實爲難矣孔子
云生而知之者上學則亞之多聞博識知之次也余宿尙
方術請事斯語漢長沙太守南陽張機仲景撰

凡例

難經云傷寒有五有中風有傷寒有溼溫有熱病有溫病
卽素問寒暑燥溼風之五氣也五氣病人相似人不能辯
通稱傷寒今古皆然仲景明知不盡屬傷寒故就人人其
稱之名而分析之此傷寒論之本義也自叔和顛亂後知
此義者甚少是以太陽一經言人人殊混淆特甚其尤不
可者以桂枝麻黃大青龍分爲三卷而作三綱鼎立之說
也蓋一誤則無所不誤矣皆由未窺五氣病人之根柢耳
近惟程郊倩程扶生兩家大旨已得茲集中太陽一經卽
倣兩公之意而編次之而又不取盡同者何也各自安其

心也

編傷寒家不外類敘法然類敘之而有重複之嫌分置之而有恰當之妙論中亦復不少如太陽病外證未解不可下也下之爲逆欲解外者宜桂枝湯主之此本桃核承氣外證未解之治方也倘抽出之則解外處有缺文之憾而類聚處有重複之嫌矣論脈亦然讀者思之

是書集註或一二家或三四家全錄者有之節取者有之或融會大旨而少加潤飾者亦有之大抵正解在前餘義在後彼此互發以明要旨然必標明姓氏溯厥所由至其人之先後次第以註解論不以時代論